

編號 2 號

【火燒岫崗¹】李宜諭原作

在鄉下，鬧鬧熱熱個舊曆年一過啊忒，又伸著恬靜個生活。毋過，行過消防隊時，會看著該一臺一臺個消防車駛出車庫停在路脣，雖然看毋著無閒泊杈個身影，乜聽毋著緊張刺耳個警報聲，毋過，空氣裡背固等息把仔愛停動個電波，一種神經擱纏個氣氛。

舊曆二月係美濃人掛紙個時節，恁多年天時改常²，春雨慢到，二月個岫崗燥絲絲仔，故所，第一個拜六掛紙個臨暗開始，就會看著岫崗頂出現沖天個煙，接下來紅紅個火光就透出來也：阿姆哀唷，火燒岫崗哩！消防車個身影像走相逐樣仔春一路出，警報聲在街路頂颺等過³，一臺、兩臺、三臺……總概都出動哩，毋過，斷烏過後就難耐也，高不將換手腳流掠個阿兵哥，拿等鑷仔、刀嫵同附近個竹頭、樹仔、草仔劈忒——斷火路。

第二日打早，「轟……叮叮叮叮、叮叮叮叮」直升機個聲就在天頂來來去去響無停。「直升機去美濃湖舀水哩啲！」美濃湖

黏時鬧熱起來，大家煞煞號隻好位仔，坐下來定定仔看等直升機在湖面舀水个景象。遠遠飛過來个直升機，會到美濃湖个時節，就會定定仔降下來，等到肚屎下背个大袋仔揸著水面，佢就會遽遽同袋仔向前拖一下再擲起來，淦淦一大袋个水就吊起來也，續等就同這恁大袋个水晃晃激激⁴吊到廣善堂背个岫崗頂，對半天高倒啊下。恁大袋个水，隨化做一陣白白个濛煙散淨淨。

天頂个直升機一轉又一轉、對打早飛到斷烏；山腳下消防車个水一管又一管緊洩；岫崗該紅紅个火跡對山前遭到山背、對山坪遭到山頂。恬靜个暗夜，總會聽著竹頭燒到劈里啪啦⁵響个聲，火屎就跔等風一哪仔飛，等到天光該下，人家个屋頂、大路項、田坵肚跌到全全係烏烏个火燂煤。岫崗个火日夜燒等，山下个消防車、救護車、阿兵哥乜日夜掌等……。下把仔，伸著沖天个白煙，大家想愛轉擺⁶一下个時節，紅紅个火尾又好恬恬个躡啊出⁷，就恁仔一直愛燒到掛紙結束。

火燒岫崗對環境、對山林个破壞十分大，看著劈竹頭个阿兵哥分樹杈仔剛⁸到手同面都血流血著，實在分人已毋盼得！掛紙个方式，係毋係需要鄉親好好來思考、參詳呢？

¹ 岫崗：音 in gong^ˊ；小山崗。

² 改常：音 goi^ˋ song^ˇ；反常。

³ 颺等過：音 xiu den^ˋ go；行動迅速如風而過。

⁴ 晃晃激激：音 gong^ˇ gong^ˇ gieb gieb；因搖晃使得水從容器中溢出來。

⁵ 劈里啪啦：音 pi li pa la；擬聲詞。形容爆裂、拍打等的連續聲音。

⁶ 轉擺：音 zon^ˋ bai^ˋ；休息。

⁷ 躡啊出：音 liung^ˊ a cud^ˋ；鑽出來。

⁸ 剛：音 gua^ˋ；被尖銳的東西劃破。

112年全國語文競賽客家語朗讀文章國中學生組（四縣腔）

編號 7 號

【盡風神个社團活動】劉純汝原作

兩年前正開學時節，拿著社團選單，哇！一拖拉拈¹呢，有服務隊、排球隊，還有童軍團、熱舞社……，該央時，佢毋知愛選哪隻正好？欸，「西洋劍隊」！吾目珠一金，仰恁沙鼻、恁風神个名仔呢？「嗯，就選你哩！」

這下恁起，到入隊个第四隻月，佢總算有機會參加全國比賽！換佢上場哩：劍衫拉好勢，面落仔膠手落仔七戴好勢，夾起電衫、跔正馬步，盡拚哩啲！比賽一開始，佢拿等劍煞力拈滑步搶前進攻，使出蠻力拂啊拂欸。旨知，佢長刺、佢撥擋，佢飛刺、佢敲劍……，阿姆哀！總下分佢閃淨淨，戰術七分佢看透透！吾个心肝發勾筋²，手腳亂忒哩，節奏七亂忒也；對手密密咻！咻！咻！咻，佢嘎緊揮空緊失分，輸到恹恹恹恹！

佢一比煞，軟怠怠个雙腳拍拍風跪落地，賠命个「啊」一聲，就像氣凹凹仔个鬥雞，落喪落喪³！原旦个自信怕係走到天頂同白雲搞困人尋去咧！

貼心个劍隊伴仔，全都行兼佢：有人送涼水、有人撚背囊、還有人摺佢搨核核，教練也柔柔仔安慰佢講：「人生啊，有時星光、有時月光，你打到當慶咧，下二擺再過加油！」目汁強強會忍毋核个佢，深深感受著佢兜親像寒天个細日頭，吾心肝肚黏時燒暖燒暖！

人講「臺頂三分鐘，臺下十年功」正經有影。聽起來恁風神个「西洋劍」，做起來無恁該！除忒考反應、比體力，還愛動腦筋、想戰術。這兩年來，一擺又一擺毋係你贏就係佢輸个比賽，分佢學習著：仰般面對失敗、仰般面對毋湛斗个自家，面對問題、解決問題！佢當煞猛打拚，發揮客家人硬頸精神个本等，練好基本功，抓捉要領；十年磨一劍！吾个劍術緊來緊進步咧，武藝比得古代个花木蘭哩！

「西洋劍」係源自十七世紀个歐洲，也係奧運比賽項目之一：有分鈍劍、銳劍、軍刀三種。競賽員比賽个時節，企在鐵枋仔頂高个兩片準備，等聽著「啊咧⁴」，用劍頭先刺著對手有效个部位就算得分，係嶄然有速度感摺爆發力个運動。

「西洋劍」毋單淨培養專注力、思考力，還有觀察力同判斷力，係「盡風神」个社團活動哦！

¹ 拖拉拈：音 to' la gu'；語源於日語「トラック」，卡車，此文形容很多之意。

² 心肝發勾筋：音 xim' gon' bod' giu gin'；指心裡很著急。

³ 落喪落喪：音 log song log song；表垂頭喪氣之意。

⁴ 啊咧：音 a le'；劍擊術語「Allez」，表「開始攻擊」。

【 崁下該頭杌仔樹 】徐秀英原作

歇在鄉下，屋脊種幾頭仔番樣¹樹、牛眼、杌仔係當平常个，一到打子个時節，管佢有熟抑吉熟，反正食得个東西，細人仔絕對無放過佢！就係吵著睡當晝个叔公叔婆來大聲逐，該下晝就無戲好唱哩。

吾屋下就在伙房个最尾析，崎仔溜啊下就係礮崁，崁下个圳溝係細人仔熱天个天堂，洗身仔、屎魚仔、捉蝦公、釣蛤蟆蚶仔，麼个想得著个空頭，細人仔就搵得著來搞！該頭杌仔樹，就係對崁下該石壁項疍出來个。

吾婆當好食這頭个黃杌仔，見看著杌仔會食得該駁仔，佢就會怙等杖仔行兼來同佢這兜細啞仔講，青杌仔食咁會屙硬屎，愛等佢黃咁正好食。細人仔嘴項應講好，一群豺狗哪！哪管得著²佢兜該張嘴，幾雙賤手揪得著个，全部都摘來塞牙縫咧，除了打在忒樹尾摘毋著个！吾爸就會拿竹篙叉去夾下來，較硬个佢會自家食，較熟个佢會放在米缸裡背，翕加兩日仔正拿去吾婆間項。無牙齒个阿婆，糜啊糜欸，面項滿足个笑容，到這下佢都還記得。

¹ 番樣：音 fan' son；芒果。

² 哪管得著：音 nai gon` e` diau；哪管得住。管不住。

該頭杌仔樹頂，輒常就會有青鸛仔³飛來做竇：青鸛仔毋驚人，佢兜在樹下搞家啦飯仔，佢兜在樹頂啾啾滾飛來飛去；細人仔雖然番綻，毋過從來毋識去撞過厥竇。較盤擎个會蹶上石壁去算看啊，竇肚生有幾多粒卵。一駁仔過後，樹頂又加加幾下隻得人惜个細鳥仔哩啲，就恁仔生生不息。

樹頂高也有膨尾鼠跳上跌落，還有共樣毋驚人个山狗太、狗嫫蛇趕上趕下。膨尾鼠尾絨絨，當得人惜，屋下食伸个果子抑係果仁、果子皮放在樹底下，佢兜會輪等跳過來食，咕嚕嚕个目珠仁挨挨轉，該驚人來搶食个樣仔，實在還生趣。山狗太、狗嫫蛇就無恁得人惜咁，因為厥皮膚有保護色，分樹梗抑係燥葉仔壅到共下个時節，一無注意就會害人分佢嚇著，故所佢盡惱山狗太。

恁多年過去咧，崁下該頭杌仔樹早就毋在咁，毋過，該童年个回憶，哪久就恁香甜个放在吾心肝肚。

³ 青鸛仔：音 qiang' li' e；綠繡眼。